

Parlamentario Rocco Tjon: Contestanan di Minister Oduber a trece mas pregunta

Di con cobra pueblo awo, si pa 2018 ya caba Parlamento a aproba fondonan necesario pa cubri gastonan di Serlimar



ORANJESTAD (AAN): Durante conferencia di prensa di partido-MEP, lider di fraccion, Sr. Rocco Tjon a elabora riba un carta cu nan a manda siman pasa na Minister di Infraestructura y Medio Ambiente, Otmar Oduber, pa loke ta trata maneho di Serlimar, y tambe riba contestanan cu nan a ricibi, pasobra e mester bisa cu en bez cu e contestanan aki trece claridad pa loke ta e cobramiento di recoge sushi, esaki a trece mas pregunta.

Na prome instante ora el a lesa e contestanan, Tjon a bisa cu el a kere e ta lesando un carta di CAft pa su contenido. El a ripara cu esun cu a formula e contenido no ta na altura con estado di derecho ta funciona. Y e ta kere cu e mandatario en cuestion, no a lesa e contenido di e carta, y ta sola-

mente aanbiedingsbrief el a firma. Algun siman pasa, presidente di Parlamento a splica con estado di derecho ta funciona, politica, gobernacion, e funcion di control ta a base di confianza. Como representantenan di pueblo ta haya e confianza di pueblo pa eherce e trabao di parlamentario, y e ta enfatiza cu malfuncionamento di parlamento ta un di e motibonan cu Mike Eman a hiba un maneho desastroso y hinca e pais na unda e ta awendia.

Parlamento atravez di un programa di gobernacion, atravez di loke ta wordo presenta na nan, manera durante presupuesto ta duna e confianza y aproba of desaproba esaki. Den cierto casonan, nan tambe ta cuestiona si cierto propuestanan ta desvia di nan caminda.

E parlamentario a indica cu e contestanan cu nan a haya, fuera di no trece claridad y transparencia cu organo parlamento ta exige, e ta hasta contradeci contestanan di e mandatario mes! Tjon a duna ehempel specifico, na unda nan a puntra pa manda nan e maneho cu e decision aki a wordo basa, y e contesta tabata cu esaki no basa



riba un maneho, ta trata un ley, pero ora manda e documentonan e mes a referi na un nota di maneho, cu ta den programa di gobernacion. Cu porcierto, den programa di gobernacion, cu ta un meerjarenbeleidsplan, ningun caminda ta para cu ta bay cobra pa recoge sushi.

Tjon a bisa cu esaki no ta e punto di discusion awo-raki, sino e motibo pakico nan a haci preguntanan ta pasobra pa loke ta trata 2018, durante presupuesto, cu ta consisti tambe un parti

di beleidsvoornemens di e minister, ta wordo splica bon cla cu tin discusionnan tumando lugar ainda cu diferente grupo cu si ta bay cobra of no, y pa motibo aki e 16 milyon cu a wordo presupuesta no ta suficiente, y pa gobierno por cumpli cu e tarea di piki sushi y percura pa gastonan wordo cubri, a pidi 5.4 milyon florin extra, cu Parlamento a aproba e suma extra. Tjon a enfatiza cu e discusion no ta si ta cobra of no, con ta bay yega na un maneho di desperdicio eficiente. E punto esencial di con ta bay cobra awo, 1 di Juli 2018, si pa 2018 ya caba Parlamento a aproba fondonan necesario pa cubri esaki!

E ta bisa cu ta lamentable cu e pregunta mas importante aki no a wordo contesta. Maneho ta algo fluido, esaki ta wordo adapta na prioridad y circunstancianan, cu semper por cambia. Prioridadnan mester keda corecto, y pesey ta wordo referi na documentonan cu ta wordo interpreta door di e mandatario na un cierto manera, como Parlamento cu ta controla, nan ta wak esaki completamente diferente, y ta importante pa motibo cu e topico aki a trece hopi

conmocion den comunidad pa wordo debati durante un reunion publico.

Tjon a indica cu nan a haci peticion na presidente di Parlamento pa yama un reunion publico pa discuti e topico aki, pa tur aspecto wordo debati, pasobra ta wordo referi na un ley, pero si lesa e memorie van toelichting di e ley, e no ta papia cu ta solamente Serlimar por cobra pa recoge sushi, esaki ta papia bon cla cu e ley no por exclui companianan priva cu tambe ta ofrece e servicio aki.

Ley ta duna bo e base juridico pa basa un maneho riba dje, e decision aki tin di haber cu maneho, pasobra si no ta asina, e mandatario no lo referi na notanan di maneho; no lo bisa cu ta un decision tuma door di Consejo di Minister y no e mandatario so.

Parlamento ta duna confianza na un Gobierno pa ehecuta nan plan di maneho, e confianza aki ta wordo concretiza door di aproba recursionan pa nan por ehecuta e maneho aki, y si den nan concepto tin preguntanan of mester di mas claridad, nan tin deber di debati esaki pa bienestar di cada ciudadano na prome lugar.